

昭明文選箋證

古明大造集

文選箋證卷二十二

續溪胡紹煥學

貴池劉世珩校刊

束廣微補亡詩

旁證云世說新語三夏侯湛作周詩以示潘安
仁注湛集載其敘曰周詩者南陔白華華黍由
庚崇邱由儀六篇有其義而亡其辭故云周詩
然則補亡不止束皙也皙與湛俱晉武帝時人
紹煥按張隲文士傳曰人有於嵩山下得竹簡
一枚兩行科斗書人莫能識張華以問束皙皙
對曰此明帝顯節陵中篆文驗校果然朝廷士
庶皆服其博識

見本書薦士表注

然則博物又張華所

不及也

南陔孝子相戒以養也

循彼南陔

注善曰聲類曰陔隴也羣經音辨曰序云孝子相戒以養陔當訓戒鄉飲酒燕禮賓醉而出奏陔夏鄭氏注陔之言戒也以戒爲節明無失禮與詩序義合紹煥按善以陔訓隴未得詩旨音辨義亦難通竊考說文陔階次也史記孝武紀壇三垓集解引徐廣垓階次也索隱引鄒氏垓一作陔是陔爲階級之名皆在堂下對北堂言故亦得爲南陔如此與序說似不背方氏以智謂鄭康成攷工中督邊巡堂涂注今贊械

卽領磬階鐘師祓夏音咳伯厚以南咳作祓梁有階
步歌可證咳祓階三字古通

彼居之子罔或游盤

注善曰居謂未仕者按居讀爲姬語助辭禮記檀弓
鄭注居讀爲姬姓之姬齊魯之間助語也郊特牲注
同尙書微子若之何其鄭注其語助也齊魯之間聲
如姬王風揚之水彼其之子箋其或作已或作記讀
聲相似然則居與其同讀如姬而聲又與已記相似
彼居之子猶云彼其之子亦猶曹風侯人彼其之子
禮記表記作彼記晉語作彼已耳

彼居之子色思其柔

陳氏景雲曰二句當在心不遑留下如首章例各本皆誤倒

白華孝子之潔白也

如磨如錯

注善曰毛詩曰如琢如磨按太平御覽九百六十四引韓詩云如錯如磨然則廣微蓋用韓詩特倒言之以協韻耳毛詩不當引

在陵之陬

注善曰陬山足也按陬隈也見廣雅釋邱猶下云在邱之曲耳

華黍時和歲豐宜黍稷也

亦挺其秀

六臣本亦作禾校云善作亦按上以黍與麥對此以
黍與禾對恰爲一類六臣本是也作亦則文義無所
承

顯猷翼翼

注善曰廣雅曰翼翼明貌猷道也王氏疏證引此而
釋之云顯猷翼翼猶言其道大光束皙當本大雅文
王厥猷翼翼則三家詩必有訓翼翼爲明者矣紹煥
按爾雅翌明也翼與翌同重言之亦曰翌翌繇作廟
翼翼箋嚴顯翼翼然是亦以翼翼爲明者今文王傳
翼翼恭敬也

由庚萬物得由其道也

獸在于草

六臣本校云于善作在按此與魚在在藻同一句法
後人依五臣故改在爲于

星變其躔

六臣本校云五臣作星躔其變按此五臣疑躔與扇
不叶故改之然躔自有去音集韻躔文善切音紵

五緯不逆

注善曰尙書曰曰雨曰暘曰燠曰寒曰風曰時五者
來備按緯當爲躔注當同善引五躔來備以釋正文
躔也漢書荀爽傳五躔咸備各以其敘章懷注躔是

也史記宋世家作五是來備是與韙通李雲傳作五氏來備氏是古通用字東晉用今文尙書以韙爲是後人不達此義改韙爲緯并依尙書改注中五韙爲五者繆矣逆字亦當依六臣作愆

崇邱萬物得極其高大也

王猷允泰

注善曰毛詩曰王猷允塞猶猷古字通今常武作王猶善引當同謂常武之猶與正文之猷古字通也由儀萬物之生各得其儀也

明明后辟

注善曰爾雅曰明明察也王氏引之經義述聞云明

勉一聲之轉故古多謂明爲勉重言之則曰明明爾
雅疊疊勉也鄭注禮記曰疊疊猶勉勉也疊疊勉勉
明明亦一聲之轉大雅江漢明明天子令聞不已猶
言疊疊文王令聞不已也紹煥按明明后辟與大雅
棫樸勉勉我王語意相似大戴誥志明明孟也孟亦勉
也爾雅孟勉也明孟亦一聲之轉

謝靈運述祖德詩

弦高犒晉師

注善曰呂氏春秋曰於邊候暗之道也高誘曰暗國
名也音晉今爲晉字之誤也按事本犒師而云晉者
文所不通故引呂覽以證字當作暗今悔過篇注誤

作暗晉國也與善所引不合

臨組乍不縹

善乍字無注按乍止也謂止而不縹也說文乍作𠂔止也从亾从一今俱作暫解此猶存古義

龕暴資神理

注善曰孔安國傳曰龕勝也今西伯戡黎作戡按引傳當作戡下有戡與龕音義同六字與本書謝元暉詩注合今脫去

韋孟諷諫詩

迭彼大彭

余氏文選音義曰按鄭語及左傳杜注孔正義豕韋

有二一彭姓祝融後與大彭爲商伯武丁滅之一劉
姓堯後彭姓豕韋滅之承其國殷未封於唐周成王
滅唐遷之於杜宣王殺杜伯其子隰叔奔晉四世及
士會食邑於范氏孟詩云迭彼大彭勳績維光孟五
世孫元成詩云赫赫我祖侯於豕韋賜命建伯有殷
以綏則孟之先爲彭姓之豕韋矣孟詩又曰至于有
周歷世會同王赧聽譖實絕我邦元成又曰宗周至
漢羣后歷世蓋西京時春秋內外傳未行故孟與元
成詩得肆其鋪張合二姓豕韋並爲其祖益加妄誕
以欺世也紹煥按容齋四筆引此下王赧聽譖實絕
我邦說云周至赧王僅存七邑救亡不暇豈能滅侯

邦乎孟之自叙乃祖率疏如此然則舍二說觀之則孟此詩所述俱不足徵信矣

殆其茲怙

旁證云五臣茲怙作怙茲何曰作怙茲於韻乃協於赫君子

注善曰歎美昔之君子能庶幾自悔故光顯於後攷異曰善作昔五臣作赫所當訂正王氏念孫曰於昔君子謂秦繆也咎字俗書作昔赫字俗書作赫二形相近故昔誤爲赫紹煥按漢書作昔不誤此作赫後人依五臣改之

張茂先勵志詩

星火既夕

按夕斜也猶西也西斜夕一聲之轉晏子春秋雜篇景公新成伯寢之臺使師開鼓琴師開左撫宮右彈商曰室夕公曰何以知之對曰東方之聲薄西方之聲揚謂西向偏斜也周禮司儀凡行人之儀不朝不夕不夕言不斜向西爾雅山西曰夕陽今人亦謂夕陽爲斜陽是凡言夕皆斜西也星火至秋西流故云旣夕亦旣西也本書潘安仁詩大火西流義與此同

熠熠宵流

注善曰毛萇詩傳曰熠熠燐也按今毛詩熠熠宵行傳熠熠燐也熠字不重說文引詩亦作熠熠此正文

及注皆誤

唐類函引作
熠燿宵流

田般于游

旁證云六臣本田作出是也

養由矯矢

注善曰淮南子曰於是使由基撫弓而盼援乃抱木而長號今說山訓高注養姓也按據淮南及高注則養其姓由基其名左襄十三年傳亦云養叔茂先以養由斷讀與馬汧督誅以齊萬年爲齊萬皆割裂姓名不可爲典要而廣韻邑字注云養由氏遂以養由爲複姓矣旁證說同

彪之以文

注善曰說文彪亦文貌今虎部彪虎文也从虎彡象其文也按藝文類聚引蔡邕處士園叔則碑童蒙來求彪之用文此當本之蒙卦爻辭九二苞蒙鄭注苞當作彪彪文也王氏引之曰呂祖謙周易音訓引晁說之云京房鄭陸績一行皆作彪文也蓋古義之相傳如是然則彪通作苞苞亦文也

暉光日新

注善曰易曰君子之光暉吉又曰日新之謂盛德按茂先正用大畜象輝光日新語讀日新句或古本作暉善所見作輝與今同故置此而引彼

曹子建上責躬應詔詩表

忍垢苟全則犯詩人胡顏之讖

汪善曰毛詩謂胡顏而不速死也殷仲文表曰亦胡顏之厚義出於此旁證云今毛詩傳皆無此語毛字恐誤紹煥按卞廙蔡伯喈女賦忍胡顏之重恥卞與曹同時亦承用此語究未詳所出也

舍罪貴功者

六臣本貴作責按作責是也此言舍其罪而責之以功也本書與陳伯之書聖朝赦罪責功常本此赦與舍通

僻處西館

按應詔詩云稅此西墉西墉卽西館旁證云魏志文